



Meeqqat atuarianni, inuussutissarsiutinut, ilisimatusarfimmi il.il. ilinniartut ilitsoqqussaralugit kalaallisut oqaatsitik atorlugit inaarutaasumik misilitsittarnissaasa allatulluunniit misilitsittarnissaasa qanoq qulakkeerneqarsinnaanera pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Jens Napätôk', Partii Naleraq)

Oqallisissiap soqutiginarluinnartup qaqinneqarneranut qujanaq.

Namineq oqaaserinngisanik oqalunniarneq inuit ilaannut ajornakusoorsinnaasarpoq, ilaannullumi ajornavittarluni. Aamma taamaappoq soorlu misilitsinnerni.

Illumoorsinnaangilaq suliamut pikkorikkaluarluni oqaatsit pissutigalugit angusarlunneq, taamaattumik nunatsinni ilinniartitaanermi atuartut ilinniartullu namineq ilitsoqqussaralugu oqaatsit atorlugit misilitsissinnaanerat periarfissaasariaqarpoq.

Taama oqareerluta, pinngittoorumangilagut erseqqissassallugu oqaatigisariaqarmat meerartatta meeqqat atuarianniilli oqaatsinik ilinniartilluarneqarsimallutik paasinnissinnaalersimallutillu ingerlaqqittarnissaat sulissutigilluartariaqarmat – tassami meeqqat atuarianniit anigaanni ingerlariaqqiffiit amerlanerit qallunaatut tuluttullu allassimasunik atuartsissuteqartarmata.

Taamaattumik kaammattuutigerusuppara angajoqqaajusugut meerartatta oqaatsinik allanik ilikkarnissaannik kajumissaariuartassasugut, siunissami pilerigisaminnik ilinniagaqarnissaminut aporfilersoratik periarfissagissaarsinnaalerniassammata.

Naggataagut erseqqissassuarput – aaqqissuussaaneq eqqarsaatigalugu atuartut ilinniartullu namminneq oqaatsitik toqqissisimaffigisatik atorlugit misilitsittarsinnaanissaat periarfissagissaarnerusariaqarmat.

Tamakkuupput Demokraatiniit apuukkusutagut.